


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-14	Ibrahim	52	7	Makkiyyah	Ke-72	8



Zaman Diturunkan

Surah Ibrahim diturunkan selepas Surah ar-Ra'd iaitu di peringkat ke-empat dan terakhir kehidupan Rasulullah s.a.w. di Mekah, di antara tahun ke-11 dan ke-13 Kenabian. Zaman itu adalah zaman yang penuh dengan perancangan jahat orang-orang kafir Mekah (Ayat: 46). Ketika itu juga pembesar-pembesar kafir Quraisy merancang untuk menghalau Rasulullah dari Mekah.

Perkaitan Dan Kesenambungan Surah Ibrahim Dengan Surah Sebelum Dan Selepasnya

1. Di dalam Surah ar-Ra'd yang lalu dikemukakan falsafah yang membezakan antara kebenaran dan kebatilan selain dalil-dalil عقلي dan آفاقي. Di dalam Surah Ibrahim ini pula dikatakan bahawa syukur adalah asas yang mendorong manusia supaya bertauhid. Tauhid adalah benar dan syirik adalah bathil. Di dalam ayat ke-37 Surah ar-Ra'd yang lalu, al-Qur'an dikatakan sebagai حُكْمًا عَرَبِيًّا. Di dalam Surah Ibrahim ini pula dijelaskan bahawa sekalian rasul diutuskan supaya menyeru kaum masing-masing dengan menggunakan bahasa yang diguna pakai oleh mereka. Tujuannya ialah supaya seruannya difahami dengan baik, itulah sebabnya al-Qur'an diturunkan dengan Bahasa Arab.
2. Di dalam surah sebelum ini dan surah ini juga disebutkan tentang اولو الالباب, mereka ialah ahli tauhid. Ajaran yang baik yang mengandungi seruan tauhid sememangnya telah berakar umbi di dalam fitrah manusia, ia mempunyai perhubungan dengan alam langit dan ia berguna kepada sekalian manusia. Allah memperteguhkan pendirian orang-orang yang menerima ajaran yang baik كلمة طيبة di dunia dan juga di akhirat.
3. Di dalam Surah al-Hijr selepas ini, disebutkan tentang kebinasaan kaum Luth, kaum Syu'aib dan kaum Tsamud, di dalam Surah Ibrahim ini manusia dianjurkan supaya mengambil i'tibar daripada peristiwa kemusnahan dan kehancuran bangsa-bangsa yang lalu. Ia disebutkan dengan آيَاتِ اللَّهِ (sejarah).

Beberapa Kata Kunci Dan Tema Utama Surah

1. Di dalam Surah Ibrahim, tauhid dan syirik di umpamakan dengan cahaya dan kegelapan.

- (a) Di dalam ayat pertamanya lagi telah dinyatakan maksud penurunan al-Qur'an, bahawa tuhan menghendaki manusia keluar daripada kegelapan syirik dan kesesatan kepada cahaya tauhid dan jalan yang lurus (Ayat: 1).

الرَّكَدْبُ أَنْزَلْنَاهُ إِلَيْكَ لِتُخْرِجَ النَّاسَ مِنَ الظُّلُمَاتِ إِلَى النُّورِ بِإِذْنِ رَبِّهِمْ

- (b) Sejarah juga dijadikan sebagai bukti bahawa maksud utama mu'jizat-mu'jizat yang diberikan kepada Musa juga bertujuan untuk mengeluarkan kaumnya daripada kegelapan kekufuran kepada cahaya tauhid (Ayat: 5).

وَلَقَدْ أَرْسَلْنَا مُوسَىٰ بِآيَاتِنَا أَنْ أَخْرِجْ قَوْمَكَ مِنَ الظُّلُمَاتِ إِلَى النُّورِ

2. Dalil-dalil تاريخي disebutkan sebagai آيَات الله di dalam Surah Ibrahim.

Ma`na harfi آيَات الله ialah hari-hari Allah, tetapi maksud sebenar yang dikehendaki dengan perkataan itu ialah sejarah dan juga peristiwa-peristiwa penting yang berlaku dalam sejarah manusia, ia meliputi sebab-sebab kemajuan dan kejatuhan bangsa-bangsa. Antara sebab kenapa sesuatu bangsa itu lenyap daripada muka bumi ialah apabila mereka mendustakan para rasul utusan Allah. Antara contoh آيَات الله ialah hari berlakunya peperangan Badar iaitu pada 17 Ramadhan tahun ke-2 Hijrah, dalam peperangan itu kira-kira 70 orang kafir Quraisy telah terbunuh, salah seorang daripada mereka ialah ketua mereka; Abu Jahal. Hari `Asyura` juga merupakan salah satu آيَات الله iaitu pada 10 Muharram, pada hari itu Fir`aun, Haman dan bala tenteranya ditenggelamkan dan Bani Israil terselamat. Perkataan آيَات الله ini ada juga digunakan di dalam Surah al-Jaatsiyah ayat ke-14. Rasulullah s.a.w. diperintahkan supaya mengingatkan orang-orang musyrikin Mekah menggunakan dalil-dalil تاريخي untuk memahami sunnatullah dalam memberikan pembalasan baik dan buruk kepada manusia. Orang-orang yang sabar, bersyukur dan bijaksana mendapat pengajaran daripada dalil-dalil itu, orang-orang yang tidak sabar dan tidak cerdik pula tidak mendapat apa-apa pengajaran daripadanya (Ayat: 5).

وَذَكِّرْهُمْ بِآيَاتِنَا إِنَّ فِي ذَلِكَ لَآيَاتٍ لِّكُلِّ صَبَّارٍ شَكُورٍ

3. Perkataan نِعْمَةُ الله di dalam Surah Ibrahim juga merupakan satu kata kunci yang amat besar ertinya.

(a) Bani Israil adalah suatu kaum yang tidak bersyukur dan tidak mengenang budi. Nabi Musa yang diutuskan kepada mereka menganjurkan supaya mereka ingat akan ni`mat Allah, bagaimana Allah telah menyelamatkan mereka daripada kezaliman dan kekejaman Fir`aun dan bala tenteranya. Fir`aun membunuh anak-anak lelaki mereka, tetapi setelah mendapat semua ni`mat itu Bani Israil terlibat pula dengan kesyirikan dan kederhakaan (Ayat: 6).

وَإِذْ قَالَ مُوسَىٰ لِقَوْمِهِ أَذْكُرُوا نِعْمَةَ اللَّهِ عَلَيْكُمْ إِذْ أَنْجَيْنَاكُمْ مِنْ آلِ فِرْعَوْنَ

(b) Orang-orang musyrikin Mekah diseru supaya berfikir dan merenung agar dapat mengambil i'tibar daripada sejarah. Pemimpin-pemimpin yang tidak bersyukur akan ni`mat Allah boleh membawa kaumnya ke negeri kehancuran dan kemusnahan (neraka) (Ayat: 28).

هَلْ أَلَمَ تَرَى إِلَى الَّذِينَ بَدَّلُوا نِعْمَتَ اللَّهِ كُفْرًا وَأَحَلُّوا قَوْمَهُمْ دَارَ الْبَوَارِ

(c) Allah menyeru manusia supaya merenung dan berfikir tentang bagaimana Dia telah melengkapkan dunia ini dengan segala benda yang diperlukan, ni`matNya tidak terhitung dan tidak terhingga, jika

manusia hendak menghitung نِعْمَةَ اللَّهِ nescaya mereka tidak akan mampu. Memanglah manusia itu sangat tidak bersyukur dan tidak mengenang budi. Mereka bukan menyembah خالق pencipta segala-galanya, sebaliknya menyembah makhluk. Itulah kekufuran dan sikap tidak bersyukur yang paling dahsyat, mereka bukan memilih tauhid sebaliknya memilih kesyirikan yang merupakan kezaliman yang sangat besar (Ayat: 34).

وَعَائِلُكُمْ مِنْ كُلِّ مَا سَأَلْتُمُوهُ وَإِنْ تَعُدُّوا نِعْمَتَ اللَّهِ لَا تَحْصُوهَا إِنَّ الْإِنْسَانَ لَظَلُومٌ كَفَّارٌ ﴿٣٤﴾

4. Perkataan شكر, كفر, صَبَّار dan شَكُور yang tersebut di dalam surah ini mengandungi erti-erti yang sangat penting.

(a) Di dalam sejarah sememangnya terdapat pengajaran dan `ibrah, hanya orang-orang yang bersabar dan bersyukur dengan erti kata yang sebenarnya dapat mengambil pengajaran daripadanya (Ayat: 5).

وَذَكِّرْهُمْ بِأَيُّمِ اللَّهِ إِنَّ فِي ذَلِكَ لَآيَاتٍ لِكُلِّ صَبَّارٍ شَكُورٍ ﴿٥﴾

(b) Allah mengingatkan manusia tentang pemberian bersyaratNya bahawa jika manusia bersyukur nescaya akan Dia akan menambah (nikmat) kepada mereka, dan jika mereka tidak bersyukur maka azab yang akan menimpa mereka kerananya sangatlah teruk (Ayat: 7).

وَإِذْ تَأَذَّنَ رَبُّكُمْ لَئِنْ شَكَرْتُمْ لَأَزِيدَنَّكُمْ وَلَئِنْ كَفَرْتُمْ إِنَّ عَذَابِي لَشَدِيدٌ ﴿٧﴾

(c) Jika seluruh makhluk di dunia ini tidak bersyukur dan kufur akan ni`mat Allah, kebesaran Allah tetap tidak akan berkurang, Allah tidak memerlukan sebarang pujian daripada sesiapa pun. Dia Maha kaya dan Maha terpuji (Ayat: 8).

إِنْ تَكْفُرُوا أَنْتُمْ وَمَنْ فِي الْأَرْضِ جَمِيعًا فَإِنَّ اللَّهَ لَغَفُورٌ حَمِيدٌ ﴿٨﴾

5. Qur'an adalah sebuah kitab yang mengancam dan memberi amaran kepada manusia, ia juga memberi amaran tentang hari kiamat.

(a) Al-Qur'an adalah sebuah kitab yang memberi ancaman dan amaran, tujuannya ialah supaya manusia sedar dan insaf, juga supaya mereka mengetahui dengan sebenar-benarnya bahawa Allah jua tuhan yang layak disembah. Golongan اولو الالباب dan manusia yang bijaksana menerima baik ancaman yang diberikan oleh al-Qur'an dan mengambil i'tibar dan pengajaran daripadanya, lalu mereka dengan sepenuh hati menerima aqidah tauhid, sedangkan orang-orang yang bodoh terus berada dalam kesyirikan dan kejahilan. Ayat terakhirnya berbunyi (Ayat: 52).

هَذَا بَلَاغٌ لِلنَّاسِ وَلِيُنذَرُوا بِهِمْ وَلِيَعْلَمُوا أَنَّ مَا هُوَ إِلَهٌ وَاحِدٌ وَلِيَذَّكَّرَ أُولُو الْأَلْبَابِ ﴿٥٢﴾

52. (Al-Quran) ini disampaikan kepada manusia supaya mereka diberi ingat dan diberi nasihat dengannya; dan supaya mereka mengetahui (dengan hujjah-hujjah yang tersebut di dalamnya) bahawa sesungguhnya Allah ialah Tuhan Yang Maha Esa; dan supaya orang-orang yang mempunyai fikiran, beringat dan insaf.

(b) Di dalam Surah Ibrahim juga, manusia diberi ancaman dengan hari kiamat (Ayat: 44).

وَأَنذِرِ النَّاسَ يَوْمَ يَأْتِيهِمُ الْعَذَابُ فَيَقُولُ الَّذِينَ ظَلَمُوا رَبَّنَا أَخْرِجْنَا إِلَى أَجَلٍ قَرِيبٍ نُّجِبْ دَعْوَتَكَ وَتَتَّبِعِ الرَّسُولَ ۖ أَوْ لَمْ تَكُونُوا أَقْسَمْتُمْ مِّن قَبْلُ مَا مَا

لَكُمْ مِّن زَوَالٍ ﴿٤٤﴾